

## 十住心（12-17-1896）

一、異生羝羊心：凡夫之愚，譬之羝羊。羝羊為牡羊，只念食欲與淫欲。

二、愚童持齋心：凡夫信世間因果之道理，知持齋之為善而行之也。持齋者，不過中食之法，以之為善道者。

大日經一曰：「愚童凡夫類猶如羝羊。或時有一法想生，所謂持齋。彼思惟此少分，發起歡喜，數數修習，祕密主，是初種子善業發生。」

復以此為因，於六齋日，施與父母男女親戚，是第二芽種。復以此施，歡喜授與非親識者，是第三苞種。

復以此施，與器量德高者，是第四葉種。復以此施，歡喜授與伎樂人等，及獻尊宿。是第五敷華。復以此施，發親愛心供養之。是第六成果」。

三、嬰童無畏心：修十善行，求天道果之住心也。天上之果報雖勝，然比之佛果，則為劣朦，故曰嬰童；而離三途之苦難，故曰無畏。

四、唯蘊無我心：入聲聞乘修四諦觀法，了悟唯有五蘊之法而無人我實體之住心也。

五、拔業因種心：緣覺之住心也。業者，善惡之二業；因者，十二因緣。種有無明，無明為一切煩惱之根本，故云種。即拔除惑（無明）、業（業）、苦（十二因緣）之三法而入涅槃也。

六、他緣大乘心：法相宗之住心也。起無緣之慈，而為濟度他之大乘行之住心也。他緣者，謂緣他之眾生。

大日經疏二曰：「梵音莽鉢羅，是無義。亦是他義。所謂他緣乘者，謂發平等大誓，為法界眾生行菩薩道。乃至諸一闡提及二乘入正位者，亦當以種種方便，折伏攝受，皆令同入此乘。約此無緣大悲，故名他緣乘。」

又無緣乘者，至此僧祇始能觀察阿陀那深細之識。解了三界唯心，心外更無一法而可得。乘此無緣心而行大菩提道，故名無緣乘也。

七、覺心不生心：覺知自心本來不生也。是說三論宗之意，不生者，舉彼宗所說不生不滅、不去不來、不一不異、不斷不常，八不中之第一不。而略他之七不者，即覺一心不生乃至不常之道理而離一切戲論妄想之住心也。住於此位之行者心相，即當於三論宗。

大日經住心品說：「心主自在，覺自心本不生。」此其略語也。

祕藏寶鑰上曰：「不生覺心，獨空慮絕。則一心寂靜，不二無相。」

八、一道無為心：又名如實一道心。如實知自心，空性無境心，一如本淨心。

九、極無自性心：華嚴經所說圓融法界之理也。真如無自性，故緣起為萬法。所起之萬法，亦如真如之無自性，故萬法互相即相融。蓋華嚴法界之理，為究極為無自性之理者，

故曰極無自性。

祕藏寶鑰下曰：「善無畏三藏說，此極無自性心一句，悉攝華嚴教盡。所以者何。華嚴大義，原始要終真如法界，不守自性隨緣之義。杜順和上依此法門，造五教華嚴三昧法界觀等。弟子智儼相續，智儼弟子法藏法師，又廣五教作指歸綱目及疏。是華嚴宗之法門一一義章。」

十、祕密莊嚴心：如來以祕密之三業，開顯眾生本具之無盡功德，莊嚴之住心也。是即為真言一乘之住心。